

Masalmente pueblo a despedi di Ministro Guillermo Trinidad

ORANJESTAD (AAN) Diasabra despues di ceremonianan protocolario, religioso y politico a tuma lugar entiero di Ministro Guillermo Trinidad. Enorme cantidad di persona a asisti na e acto di entiero cual a tuma lugar na santana den Boerhaavestraat na Playa.

Den oranan di mainta e ceremonia protocolario a inicia pa 8 or y 10 cu reunion solemne di parlamento. Cinco minuut prome e restonan mortal di Excelencia Ministro Sr. Guillermo Trinidad a yega na edificio di Consejo di Ministro, unda el a ser ricibi pa e comision di Staten. Himno di Aruba a ser interpreta pa Orkestra Harmonico Arubano. Prome Ministro Nelson Oduber a entrega bandera di Aruba na representante di Cuerpo Policial. Ocho polis a tapa e caha di morto cu e bandera y despues a conduci e restonan mortal den e sala di parlamento.

Sala tabata completamente yen y por a nota presencia di varios dignatario di exterior.

Lideman di fraccion a hiba palabra y a rindi tributo na Ministro Guillermo Trinidad; parlamentarianan pa e partido M.E.P. y Watty Vos tambe hiba palabra na e reunion solemne pa rindi tributo na

Ministro Trinidad.

Por a saca afor cu cada un parlamentario cu a hiba palabra tabatin solamente palabranan di elogio, respet y aprecio e

fayecido Ministro Guillermo Trinidad, y palabranan di danki pa su aporte na

gobierno y na comunidad Arubano

Entre otro a ser expresa cu Guillermo Trinidad como parlamentario no mester di introduccion, e ta un maestro den

Staten, el a sabi di cumpli cu e tarea como Statenlid y Ministro cu hopi dedicacion y na un forma serio y sereno.

Discurso di algun di e parlamentarianan na reunion Solemne di Staten.

Parlamentario Pedro Bislip a bisa: "Mi no por keda sin menciona cu lamentablemente rara vez sobresalientenan di e circulo politico ta ricibi credito na bida pa nan presentacion y meritonan. Den e luz

aki tambe mi kier a apela riba e sentido di responsabilidad di esnan cu kier cuminsa un carrera politico, sin cu mi tin e pretension di kita credito for di otro gran estadistanan cu Aruba a conoce, pa tuma Guillermo como ehempel den boso aspiracion y prestacion politico".

Parlamentario Benny Nisbet a bisa entre otro cu Guillermo Trinidad cu como un heroe di simbolo pa su persona, pasobra el a mira den Guillermo un politico su ta destaca, un politico cu tabata sa con pa duna su mensahe cla na

henter e comunidad Arubano, y semper parlamentario Benny Nisbet a desea di por cana den e sobra di Sr. Trinidad. Ora un ser humano bay laga nos, semper ta keda algo atras, e ta e memoria cu cada

un di nos tin di dje den su persona indudablemente el a destaca como politico y gobernante, el a laga un ehempel atras pa un y tur cu ta posible den politica pa hiba politica y pa hiba gobernacion na un nivel halto. Di no permiti emocion domina, pero dentro di situacionnan dificil sa con pa defende interes nan di bo pueblo. Ministro Guillermo Trinidad tabata un ser humano unico, un ser

humano cu a dedica un gran parti di su bida na progreso di e comunidad.

Parlamentario Eddy Werleman den su discurso a bisa cu den e ultimo capacidad a siña conoce y cultiva aprecio pa Guillermo Trinidad. Den añanan setenta e tabata milita den e mes partido politico.

El a siña conoce Guillermo e tempo como un persona cu fundamentalmente e mes calidatnan sobresaliente cu asina tanto ta worde elogia. Su don pa scucha, su capacidad analitico, y su deseo fer-

viente pa semper entrega e mejor prestacion, a haci cu den curso di añanan el a crece den aptitud politico y administrativo, y igualmente den personalidad. Hasta ora di trata cu situacion di gran controversia, el tabata sabi di comparti su mes na un manera unico den nos cultura politico. Quiebra entre Guillermo y e partido PPA tabata diferencianan fundamental. Di parti di Guillermo, sin embargo, nunca a cay un solo palabra for di e lugar. Den tur serenidad el a tuma e decisionnan cu el a sinti mester worde tuma. Guillermo a enfrente firmemente e consecucionan di tal. Pa hopi politico un tal crisis ta nifica invariabilmente fin di carera. No pa Guillermo, el a sobrevivir, recupera y traza su trayectoria sin estorbo, te ora prematuramente el a worde confronta cu e destino final di nos tur, parlamentario Eddy Werleman a termina bisando.

Parlamentario Watty Vos tambe a hiba palabra: Sr. Vos a bisa cu na hopi biaha ta sosode cu na ocasion di fayecimento nos tin e tendencia di trece y duna elogio na loque un persona a haci pa su bida. Sr. Vos a bisa cu e kier a bay un poco mas leeuw como cu e conoce Sr. Guillermo Trinidad y el ta kere weitando un di e invitadonan y amigo Gezagebber di St. Maarten y Ministro Plenipotenciario Sr.

Roland Lacle, personanan entre otro cu conoce for di chiquito cu a conoce Guillermo tambe for di chiquito tempo den bario, school, den Dakota e relacion a keda ey nan y asina esey esey parlamentario Vos a sigui cu e amistad hopi estrecho cu otro.

Sr. Vos a bisa cu el a hunga futbol hunto cu Guillermo den equipo nacional di Aruba y tin varios cos cu Guillermo y Watty a haci hunto y door di esey nan a crea un amistad asina grandi.

Tempo cu parlamentario Vos a drenta politica den e partido M.E.P., prome hende cu el a pensa ariba dje ta Sr. Guillermo Trinidad, pero Sr. Trinidad tabatin compromisonan haci caba cu P.P.A. y el a bisa francamente cu su amigonan y su bario den su mayoria ta cu e partido y ta pesey e ta bay riba lista di e partido y naturalmente su decision a ser respeta.

Sr. Vos a pasa basta rato riba amistad fuera di politica, den politica e cu Guillermo a drenta politica hunto, bira miembro di parlamento hunto y e confianza cu Guillermo Trinidad y e bon relacion tanto riba nivel di Staten como Eilandsraad, Ministro, Diputado. Y fundacion di e partido RUBA.

Parlamentario Watty Vos a bisa "Varios cosnan ta pasa den politica y hopi biaha nos no ta tene cuenta cu nan, pero si ta bira asina cu hasta den politica bo ta crea un famia grandi, mescos bo ta crea den otro profesionnan bo ta crea e den deporte, pero den politica tambe bo ta crea un familia grandi aunque cu hopi biaha cu diferencia di opinion pero bo ta keda miembro di e familia, y awe nos ta ripara cu un miembro di e familia aki a fayece".

Segun Parlamentario Vos; Sr. Guillermo Trinidad no solamente tabata un ministro, pero antes e tabata diputado pa PPA, den cual posicion tambe Sr. Vos tabatin bon relacion cune siendo ministro di un otro partido y e diputado di un otro partido.

Parlamentario Vos a bisa cu na momento cu Gabinete Eman a worde instala nos tabatin Guillermo como oposicion, cu ki ora cu Guillermo papia hasta ora cu e critica un gobierno, e ta critique na un manera simpatico y ta pesey semper tambe mi ta tin un aprecio y admiracion hopi hopi grandi pe. Sr. Vos a bisa cu na momento di instalacion di e gobierno aki, el a bisa den su discurso y a bisa cu nos lo bay haya falta di dos hende, Sr. John v/d Kuyp y Guillermo Trinidad cu mi ta considera y nos ta considera como dos parlamentario hopi experiencia cu bon base y cu a demostra tambe calidad y nivel di parlamentario.

Segun parlamentario Vos el a agrega, sin embargo e contenido di weita Sr. Guillermo Trinidad nos colega y amigo ta bay corona su carrera politico cu un posicion di Ministro y" nos no tabata sa na e momento ey cu e sacrificianan cu e lo bay haci den e trabao ey, tambe mi a bisa den e mes un rosea cu e trabao di ministro aki nos kier pa tur ministro sa cu nos no ta envidia boso, pasobra nos sa ki trabao boso ta bay encontra cune". Despues di un aña cu Guillermo ta ministro el a bisa Watty Vos cu e tin razon pa motibo cu no tin Diasabra no tin Diadomingo y practicamente no tin dia pa descansa pasobra trabao ta hopi.

Sr. a bisa cu hopi biaha un hende no ta weita ki sacrificianan bo ta haci no solamente pa su familia pa su mes, pero awe nos ta ripara un sacrificio cu ta bay mas leeuw, bo por sacrifica hasta bo bida pa bo pais y ta voluntad di Dios, y voluntad di Dios a duna cu Guillermo no ta cu nos na e momento nan aki.

Felis Flanegin Presidente di Staten y alavez Presidente di M.E.P. tabata e ultimo orador.

Sr. Flanegin a identifica Guillermo, loque el a haya di Señor Dios el a use sumamente bon y positivo pa nos comunidad. Prome como educador y despues como politico. "Mi tabatin e privilegio di a traha dos aña como colega maestro hunto cu Guillermo, el como cabezante

y ami como maestro bao di dje. Mi por testigua pa Guillermo tabata un educador ehemplar. Tur su tempo e ta dedica na alumnonan".

Sr. Flanegin a bisa cu despues el a siña conoce Guillermo como politico tambe un politico ehemplar. E tabatin e don y habilidad di analiza un problema di tur banda y ora e decisionnan por ehempel den fraccion bira hopi fuerte, Guillermo tabata e persona pacificador analizando e problema y asina satisfase tur hende.

Segun parlamentario Felis Flanegin; Guillermo a bira inmortal den bida politica aki na Aruba, pa motibo cu ora cu e kier duna un opinion skerpi, e ta bisa tur cos e ta hacie den un tipo di proverbio. Especial ta bira parti di un reinda den nos bida politica. Semper e por critica skerpi pero semper mezcla cu un tono di amabilidad.

Den parlamento aki ora cu e discusionnan bira fuerte den parlamento semper y despues di nan e ta suavisar nan tension pero kedando na un nivel halto.

Parlamentario Flanegin a bisa "Guillermo tambe ta un ser humano di camu y weso mescos cu nos tur, e tambe tabatin su error nan, pero otro banda positivo riba bida surpasa e bandanan negativo bo ta bira politico di talla hopi grandi y esey tabata Guillermo.

Felis Flanegin a sigui bisa; Guillermo a tuma riba su mes un tarea sumamente dificil como ministro di finanzas pa e pais Aruba. Aunke cu dificil y pisa e tarea aki tabata, pero nada no tabata demasiado pa Guillermo. El a cumpli cabalmente cu tur su energia pa su trabao, lamentablemente Señor Creador no duna Guillermo pa asina e por a termina su tarea, ni tampoco pa e corona su carrera politico sublime cu broche di oro. "Nos cu ta keda atras lo lamenta su desaparicion, pasobra bo ta un gran politico aki den, den tur sentido di palabra pa amigo y contrincante, nos y Aruba ta perde un gran politico y especial nos aki den politiconan ta perde un gran amigo, pa Señor creador todopoderoso duna Guillermo un lugar den su reino, Guillermo amigo sosega na paz", tabata palabranan parlamentario, Presidente di Staten y di partido M.E.P.

Despues di e discursonan e restonan mortal di Guillermo a ser hiba Plaza Libertador Gilberto Francois Croes, unda miembronan di parlamento, coleganan ministro, douaneronan y pueblo di Aruba a para den fila hopi largo pa ricibi e restonan mortal.

Tabata tin guardia di honor door di miembronan di consejo di Ministro, y tambe door di organisacionnan social, financiero, economico y deportivo. Pueblo a haya ocasion pa extende nan condolencia y alavez tuma despedida di Ministro Guillermo Trinidad.

Despues di ceremonia di actonan protocolario, e cortejo funebre a sali for di Plaza, direccion Dakota pasa den Rondweg, Caya Betico Croes pa misa di Oranjestad.

Despues di ceremonia religioso pa siete pader, cantonan di coro di Maybeline Arends, discurso di Prome Ministro, e restonan a ser hiba santana di Oranjestad. Guillermo a ser acompaña pa un cortejo funebre encabeza pa Polis, sigui pa Consejo di Ministro, parlamentarianan, organisacionnan deportivo, social, sindical, gubernamental, amigo, conociman y politiconan di tur color politico.

Na santa despues di ceremonia religioso, Gobernador Interino Max Croes y Prome Ministro Nelson Oduber a hiba palabra. Polis a dispara 21 tiro y interpreta e tema "Silencio". Bandera di Aruba y di MEP a ser entrega na Sra Frances Trinidad-Kelly. Un miembro di familia a dirigi palabra di gradicimento na Gobierno y e comision.

Finalmente pueblo por a tuma despedida di Guillermo.

Riba e combinacion di foto por mira partinan di e ceremonia di entiero di Guillermo Trinidad, Ministro di Finanzas.



Sonesta Hotel Beach Club & Casino Aruba

THE SONESTA HOTEL BEACH CLUB & CASINO ARUBA

"EXCELLENCE.....WE TAKE IT PERSONALLY"

Here is the opportunity for you to excel as an individual.. We invite you to apply for the following positions:

- MANAGER WATERFRONT RESTAURANT
- ASSISTANT MANAGER WATERFRONT RESTAURANT
- BEACH ATTENDANT
- FRONT OFFICE CLERKS
- RESTAURANT CHEF
- WAIT STAFF
- RESTAURANT HOSTESS
- POOL ATTENDANT
- OVERNIGHT BELLMAN

This is a personal invitation to come and visit us so we can discuss one of these positions and offer you an opportunity to join us because we believe we are able to present you "UN PASPOORT PA UN CARERA EXITOSO".

Please direct your application and resume to the HUMAN RESOURCES DIRECTOR, c/o L.G. Smith Boulevard 82, Oranjestad, Aruba, Tele-phone 36000 ext. 150-151.

SONESTA HOTEL - UN PASPOORT PA UN CARERA EXITOSO